

【经文信息】大正藏第 18 册 No. 0869

## 金刚顶经瑜伽十八会指归 2 卷

No. 869

### 金刚顶经瑜伽十八会指归一卷

开府仪同三司特进试鸿胪卿肃国公食邑三千户赐紫赠司空谥大鉴正号  
大广智大兴善寺三藏沙门不空奉 诏译

金刚顶经。瑜伽有十万偈十八会。初会名一切如来真实摄教王。有四大品。一名金刚界。二名降三世。三名遍调伏。四名一切义成就。表四智印。于初品中有六曼荼罗。所谓金刚界大曼荼罗。并说毘卢遮那佛受用身。以五相现成等正觉(五相者所谓通达本心修菩提心成金刚心证金刚身佛身圆满此则五智通达)成佛后。以金刚三摩地。现发生三十七智广说曼荼罗仪则。为弟子受速证菩萨地佛地法。第二说陀罗尼曼荼罗。具三十七。此中圣众。皆住波罗蜜形。广说入曼荼罗仪轨。为弟子受四种眼。说敬爱钩召降伏息灾等仪轨。第三说微细金刚曼荼罗。亦具三十七圣众。于金刚杵中画。各持定印。广说入曼荼罗仪轨。为弟子令心堪任。令心调柔。令心自在。说微细金刚三摩地。修四静虑法。修四无量心及三解脱门。第四说一切如来广大供养羯磨曼荼罗。亦具三十七。彼中圣众。各持本幟帜。供养而住。广说入曼荼罗法。为弟子说受十六大供养法说。四种秘密供养法。第五说四印曼荼罗法。弟子受四种速成就法。以此曼荼罗。求悉地成就。像如上四曼荼罗中所求悉地。于此像前求成就。

第六说一印曼荼罗。若持毘卢遮那真言及金刚萨埵菩萨具十七尊。余皆具十三。亦说入曼荼罗仪。与弟子受先行法。修集本尊三摩地。

次说降三世大品。有六曼荼罗如来成等正觉已。于须弥卢顶。转金刚界轮已。与诸菩萨。名号受职已。摩酰首罗等刚强难化。不可以寂静法而受化。尽虚空遍法界一切如来。异口同音。请以一百八名赞。礼金刚萨埵。如是诸天。不可以寂静法而受化。时金刚手菩萨受一切如来请已。即入悲怒金刚三

摩地。现大威德身。以种种方便调伏。乃至命终。摩酰首罗死已。自见于下方。过六十二恒河沙世界。名灰庄严。彼世界中成等正觉。名为怖畏自在王如来。执金刚菩萨以脚按之。诵金刚寿命真言。复得苏。既受化已。金刚萨埵则说大曼荼罗。引入诸天。受金刚名号。诸天有五类。

居上界天王。摩酰首罗等无量诸天及后。

第二游虚空诸天日天子等无量诸天及后。

第三居虚空天。魔王等无量诸天及后。

第四地居天主藏天等无量诸天及后。

第五地下嚩啰呬天等无量诸天及后。悉皆引入已。勅诸天建立诸曼荼罗。汝等赴会。所求一切悉地皆与成办。此等皆是外金刚部。

第一说大曼荼罗仪则。皆具三十七。说降伏法及修神通法。

第二说秘密曼荼罗。具三十七。说引弟子仪。此中诸音声及金刚歌舞。

第三说法曼荼罗。具三十七。说引入弟子仪。此中说以慈悲喜舍。作阿毘遮噜迦法。微细金刚调心仪轨。

第四说羯磨曼荼罗。具三十七。说入曼荼罗仪。令弟子学护摩仪轨。于无量佛菩萨所。成广大供养。速得悉地现前。说二十五种护摩炉随类所求法。

第五说四印曼荼罗。具二十一。成就诸药法等。已上四曼荼罗中。成就法。于此曼荼罗中成就法于此曼荼罗像前求。

第六说一印曼荼罗。具十七。说引入弟子及先行法。次为外金刚部众。说四种曼荼罗。各说本真言本印契献佛。佛为说教勅大曼荼罗。具三十七。说引入弟子仪。说为弟子使役外金刚部轨则。此中说大佛顶及光聚佛顶真言及契。亦通一字顶轮法。

次说第二教勅三昧耶曼荼罗。彼诸天后等。各献本真言。佛为说曼荼罗。具三十七。说为弟子说修药叉药叉女法。广说诸仪轨。

次第三说教勅法曼荼罗。诸天说真言献佛。佛为彼等说曼荼罗。具三十七。说引入弟子仪。为弟子说诸天之法印已。由此印不违越本誓。

次第四说教勅羯磨曼荼罗。具三十七。说引入弟子仪。彼等诸天。各说本真言。佛为说曼荼罗。说诸天舞仪。说成就诸事业速疾法。次说遍调伏大品。有六种曼荼罗。

第一大曼荼罗。具三十七。皆观自在菩萨变现。说引入弟子仪。此中说十六种成就速疾神通三摩地仪。

第二说三昧耶曼荼罗。具三十七。皆观自在菩萨变现。说引入弟子仪。此中说钩召敬爱十六种三摩地。

第三说法曼荼罗。具三十七。皆观自在菩萨变现。说引入弟子仪。此中说修心及求智慧辩才法十六种。

第四说羯磨曼荼罗。具三十七。皆观自在菩萨变现。说引入弟子仪。此中说莲花部供养仪。及转罪障报。障盖缠业障法。

第五说莲花部四印曼荼罗。具二十一。皆观自在菩萨变现。说引入弟子仪。此中说成就。先行法及成就先行如上四种曼荼罗法。

第六说莲花部中一印曼荼罗。具十三。皆观自在菩萨变现。说引入弟子仪。此中说修本尊法。通修世间出世间法。

次说一切义成就大品中。有六曼荼罗。第一大曼荼罗。具三十七。此中说引入弟子仪。由入此曼荼罗。除贫匮业。说求丰财。求佛菩萨位及世间荣位。

第二秘密三昧耶曼荼罗。具三十七。此中说引入弟子仪。说求伏藏法。速满檀波罗蜜福德聚法。

第三法曼荼罗。具三十七。此中说引入弟子仪。说宝部中修三摩地法。令心安住。令心堪任。令心调柔。令心自在。见虚空藏菩萨法。

第四羯磨曼荼罗。具三十七。此中说引入弟子仪。说加持掘伏藏事业法。并说宝部中广大供养诸佛仪。

第五四印曼荼罗。具二十一。说引入弟子仪。说修先行法。及说。四曼荼罗中悉地法。

第六一印曼荼罗。具十三。说引入弟子仪。说修一尊法。及修诸药等三摩地。皆是则彼婆伽梵执金刚虚空藏变化。次都说如前一曼荼罗中。秘密助成方便散诵。次后示释迦牟尼佛。降于阎浮提。变化身八相成道。皆是普贤菩萨幻化。一切如来还以一百八名。赞扬金刚萨埵。如是第一会。

次说第二会。名一切如来秘密王瑜伽。于色究竟天说。具四大品。广说微细实相理。及广说降摩酰首罗摩。酰首罗天。以偈与金刚菩萨酬答。

次说第三会。名一切教集瑜伽。于法界宫殿说。一切如来异口同音。问金刚萨埵菩萨。一百八问。金刚萨埵菩萨一一答。此经中说大曼荼罗。五部。一部中五曼荼罗。各具三十七都成一大曼荼罗。一一尊各各说四印。所谓大印。三昧耶印。法印。羯磨印。各说成就法。此经中说一百二十五种护摩炉。一一炉所求各异。

次说第四会。名降三世金刚瑜伽。于须弥卢顶说。金刚藏等八大菩萨。一一尊各说四种曼荼罗。初会说降伏摩酰首罗。及诸天入曼荼罗授职位授名号四种曼荼罗。所谓大曼荼罗。三昧耶曼荼罗。法曼荼罗。羯磨曼荼罗。及一一尊。说引入弟子仪及成就法。后都说诸尊三昧耶结印次第。及说秘密禁戒及秘密修行。

第五会名世间出世间金刚瑜伽。于波罗奈国空界中。略说五佛曼荼罗。及诸菩萨诸外金刚部曼荼罗。一一曼荼罗具四种。各说引入弟子仪及求悉地法。

第六会名大安乐不空三昧耶真实瑜伽。于他化自在天宫说。此经中说普贤菩萨曼荼罗。次说毘卢遮那曼荼罗。次后说金刚藏等。至金刚拳菩萨及外金刚部。说般若理趣。一一尊具说四种曼荼罗。各说引入弟子仪。授理趣般若波罗蜜多法及受四种印法。品中各说求世间出世间悉地法。

第七会名普贤瑜伽。于普贤菩萨宫殿中说。此经中说普贤菩萨等。至金刚拳菩萨及外金刚部。一一尊各说四种曼荼罗。说引入弟子仪。说受四种印。修世间出世间悉地。此经中说修行人。无时无方。不依世间禁戒。以菩提心为先。无为戒为本。



第八会名胜初瑜伽。于普贤宫殿说。普贤菩萨等。至外金刚部。各各说四种曼荼罗。说实相理。及分别诸曼荼罗仪则。稍广于第七会说。大略同。

第九会名一切佛集会拏吉尼戒网瑜伽。于真言宫殿说。此中说立自身为本尊瑜伽。诃身外主形像瑜伽者。广说实相理。并说五部根源。并说瑜伽法。具九味。所谓华丽(金刚萨埵)勇健(毘卢遮那)大悲(持金刚)喜笑(观自在)瞋怒(金刚光)恐怖(降三世)厌患(释迦牟尼佛)奇特(金刚笑)寂静(瑜伽中毘卢遮那)说普贤菩萨等。至金刚拳。各说四种曼荼罗。及引入弟子仪。及受四种印。并说五部中歌赞舞仪。

第十会名大三昧耶瑜伽。于法界宫殿说。普贤菩萨等至金刚拳。菩萨十六大菩萨。各各说四种曼荼罗。说引入弟子仪。受四种印法。此中说偈云。

愚童覆无智	不知此理趣
余处而求佛	不悟此处有
十方世界中	余处不可得
心自为等觉	余处不说佛

第十一会名大乘现证瑜伽。于阿迦尼咤天说。毘卢遮那佛等。至金刚毘首羯磨菩萨。及八大供养四摄。出生同真实摄瑜伽。一一尊具四种曼荼罗四种印。广说实相理。心建立曼荼罗仪则。

第十二会名三昧耶最胜瑜伽。于空界菩提场说。毘卢遮那等四部中上首菩萨。金刚拳等八菩萨及外金刚部。各各说四种曼荼罗四印等。八此经中。于自身上建立曼荼罗。说自身本尊瑜伽。广说阿字门通达于染净。有为无为无碍。

第十三会名大三昧耶真实瑜伽。于金刚界曼荼罗道场。说十方一切佛异口同音。请金刚萨埵。唯愿说三昧耶真实教法。我等先已受讫。唯愿金刚萨埵。为诸菩萨既授请已。说普贤菩萨十七字真言。说适悦不空曼荼罗。具十七。亦说四种曼荼罗。说一百八道契。说通求世间出世间悉地。随此诸菩萨及外金刚部。各各说本曼荼罗本真言本契印竟。普贤菩萨说秘密中曼荼罗十七尊支分。各复入本尊身。共成五尊。同居一莲花台。说一字真言。从眼口及一切支分。变异即成印。但住大印结羯磨印。不待先行不籍结护加持。亦不假迎请。宿业罪障不能陵逼。亦不障碍速疾成就。

第十四会名如来三昧耶真实瑜伽。此经中普贤菩萨十六大菩萨。四摄成一身。说四种曼荼罗四印。广说五部。互圆融如来部即金刚。莲花部即宝部。互相涉入。法界即真如。般若即实际。于假施设有异。于本即一体。次普贤后诸菩萨及外金刚部。各各说本真言本曼荼罗本印契。

第十五会名秘密集会瑜伽。于秘密处说。所谓喻师婆伽处说。号般若波罗蜜宫。此中说教法坛印契真言。住禁戒。似如世间贪染相应语。会中除盖障菩萨等。从座而起礼佛白言。世尊大人不应出龕言杂染相应语。佛言汝等清净相应语。有何相状。我之此语。加持文字。应化缘方便。引入佛道。亦无相状。成大利益。汝等不应生疑。从此广说实相三摩地。诸菩萨各各说四种曼荼罗四印。

第十六会名无二平等瑜伽。于法界宫说。毘卢遮那佛及诸菩萨并外金刚部等。各各说四种曼荼罗。具四印。此中说生死涅槃世间出世间自他平等无二。种心举目。声香味触杂染思虑住乱心无二。同真如法界。皆成一切佛身。

第十七会名如虚空瑜伽。住实际宫殿说。毘卢遮那佛普贤菩萨及外金刚部。一一说四种曼荼罗。具四种印。此中修行者。与一一尊相应。皆量同虚空法身相应。离一切万物。法体光明量同虚空无来无去。此经中说虚空三摩地相应法。

第十八会名金刚宝冠瑜伽。于第四静虑天。金刚萨埵菩萨请佛。为大梵天娑诃世界主。说五部瑜伽曼荼罗引入弟子仪。具三十七。亦说四种曼荼罗。具四印。下至外金刚部。为弟子。受学心念诵。于月轮上右旋列真言字。注心于一一字。实相理相应。周而复始。亦通成就世间出世间悉地。不假持珠遍数以为剂限。但证理门心不散动。住本尊瑜伽为限。此经中微细说不成就二十种相。及说邻近悉地多种相。瑜伽教十八会。或四千颂或五千颂或七千颂。都成十万颂。具五部四种曼荼罗四印。具三十七尊。一一部具三十七。乃至一尊成三十七。亦具四曼荼罗四印。互相涉入。如帝释网珠光明交映展转无限。修行者善达此瑜伽中大意。如遍照佛。一一身分。一一毛孔。一一相。一一随形好。一一福德资粮。一一智慧资粮。住于果位。演说瑜伽二乘不共佛法。说曼荼罗三昧耶法门事业。量同虚空。证者如上所说。各各分剂各不杂乱。圆证四身。所谓自性身。受用身。变化身。等流身。是能顿作利乐一切有情诸菩萨声闻缘觉及诸外道。名瑜伽金刚乘教法。

# 金刚顶瑜伽经十八会指归

金刚顶瑜伽指归一卷。

---

【经文信息】大正藏第 18 册 No. 0869 金刚顶经瑜伽十八会指归

【版本记录】CBETA 电子佛典 Rev. 1.10 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 北美某大德提供

【其他事项】本数据库可自由免费流通, 详细内容请参阅【[中华电子佛典协会数据库版权宣告](#)】

---